

17  
364

384

A R R H E S  
D E P A I X  
V N I V E R S E L L E ;

S V R L E S  
C E R E M O N I E S E T A L L E G R E S S E S  
F a i t e s a R o m e ,

P O V R L E R O Y T R E S - C H R E S T I E N

L O V I S X I V .

d i t D i e u - D o n n é .

P R E S E N T E Z A L A R E I N E R E G E N T E  
à s a i n c t G e r m a i n e n L a y e .



A P A R I S ,

Chez I. PETRINAL, & NICOLAS IACQVARD, rue  
Chartière près le Puits-Certain, au Treillis-vert.

---

M. D C. XLIX.

A V E C P E R M I S S I O N .



ANNUAIRE  
DE PAIX  
UNIVERSELLE

CONFERMONIES ET ALLIAGES  
Faites à Rome,

POUR LE ROY TRES-CHRISTIAN

LOUIS XIV

Par Dicu-Dieu  
LES AIA TINT  
L'AN 1686



A  
Paris  
chez  
M. de  
la





A LA  
REYNE  
REGENTE.



ADAME,

Le Ciel vous  
ayant dés-le ber-  
ceau, choisie pour l'heureuse épouse d'un  
Monarque dont la haute piété doit servir  
de modèle à tous les Roys de la Terre,  
a voulu par par le Don d'un zele, autant  
pieux que mutuellement rencontré en vos

A ij



sacrées personnes, rassembler és cœurs de  
 tous les peuples de ce Glorieux Empire, que  
 vostre Majesté regit maintenant, vne forte  
 esperance, qu'enfin, le bien de l'Europe,  
 ( particulièrement de cette tant redoutée  
 Monarchie ) il nous donneroit de vostre  
 sein tout Royal vn beau Dauphin, & vn  
 Roy tout ensemble ; du Regne duquel  
 toutes les Nations lassées des orages d'une  
 trop longue Guerre, doivent pour tous-  
 jours esperer le calme de la Paix. Ce qui  
 m'a obligé ( M A D A M E ) bien que le  
 moindre des sujets de cét Aiglon des Ce-  
 sars, D E D I E U D O N N E', à la  
 ferveur de vos saintes prières, plustost  
 qu'à l'importunité de nos Vœux de man-  
 dier vn recueuil veritable des Graces ren-  
 dues à Dieu hors la France, mesme à la  
 nouvelle de cét heureux & Royal Ger-  
 me, du plus juste Roy des Lys, Fils aîné  
 de l'Eglise. En quoy vostre Majesté,  
 ( M A D A M E ) agréera les vraies mar-  
 ques du Vif ressentiment des Genereux  
 François par toutes les magnificences  
 qu'ils ont fait esclater dans Rome Souve-  
 raine de toute la Chrestienté, pour s'éjouyr  
 à l'orient de leur petit, mais desja Triom-  
 phant Dominateur : recueuil qui sera bien  
 receu




receu de tous, sur tout s'ils apprenent que  
vostre bonté (MADAME) l'aye dai-  
gné agréer pour renouveler des Vœux au  
Ciel de vouloir benir le Roy, conserver  
vostre Majesté, & faire fructifier les soins de  
vostre Auguste Regence sous laquelle respi-  
re petitement,

De vostre Auguste Majesté,

MADAME,

*Le tres-humble sujet, & tres-  
obeissant serviteur,*  
JACQUES LABBE.





# AV ROY.

## SONNET.

**C**Her Monarque , où le Ciel a mis toute sa peine ,  
 Pour en faire un Chef-d'œuvre accompli de tout point ,  
 Faites que ses desirs ne nous deçoivent point ,  
 Emplissant nostre attente aussi bien que la sienne.

La Paix durant vos iours nous est toute certaine ,  
 Puisque vostre bon-heur à nos vœux se conjoint ,  
 Et que l'on void enfin que le Ciel nous rejoint  
 Apres tous les malheurs d'une Guerre inhumaine.

Dés-ja les Nations qui sont bien loin d'icy  
 Par leur ioye & leurs cris nous ostent de soucy ,  
 En nous faisant auoir une bonne esperance ,

Que quand vous regnerez absolu dessus nous  
 Les plaisirs auront lieu parmy toute la France ,  
 Et qu'on n'y verra plus la Guerre ny les coups.





# A R R H E S DE PAIX VNIVERSELLE

S V R L E S

CEREMONIES ET ALLEGRESSES

Faictes à Rome,

POVR LE ROY TRES-CHRESTIEN  
Louys XIV. dit Dieu-Donné.



COMMENÇANT par les actions de graces deuës & renduës à Dieu pour vn Don si précieux à la France, à l'vniuerselle joye de laquelle plusieurs autres que les Naturels François, ont témoigné vouloir contribuer (*comme ils ont fait particulièrement dans Rome*) Vous sçaurez que la Messe y fût chantée avec solennité, le Dimanche jour de la Presentation de tres-sainte & sacrée Vierge dans l'Eglise Nationale de Saint Louys par quatre Chœurs de la meilleure musique qui se peut choisir, ou assisterent les Seigneurs Cardinaux Bentivole & Anthoine neveux du Pape Urbain V I I I. & protecteur de France, avec Monsieur le Marechal d'Estrée, pour lors Ambassadeur de France en Cour de Rome; plus de vingt Pre-

B ij



lâts quantité de Noblesse François, & vn nombre infiny de peuple jusques hors l'Eglise, en laquelle ladite Messe de *Beata*, &c. selon la Feste du jour fût celebrée par vn Evesque, & au lieu de Prose, l'on chanta l'Ode cy jointe.



D E  
DELPHINO  
N A T O.  
O D E.

I.

**N**ON maris falsa madefactus vnda,  
Ecce sed summo rutilans Olympo,  
Numinis dono melioris exit  
Delphin in auras.

II.

Alta nunc tandem soboles cubili  
Regio surgis, toties petita,  
Quæ suo à nostris mala dura pellat  
Finibus ortu.

III.



## I I I.

Quæ faces belli, furiâsque Martis  
 Demat, in falcem gladium recurvans,  
 Integra in mœstos recreare possit  
 Pace colonos.

## I V.

Exilis totum populus per orbem  
 Lætus, & Festos celebrans honores  
 Franciæ nato manibus profusis  
 Lilia fundis.

## V.

Nósque Musarum Chorus hunc alumnum  
 Omnium votis petimus, sibique  
 Vindicat virtus, paritérque triplex  
 Gratia poscit.

## V I.

Ergo quæ nobis inopina furgunt  
 Gaudia æternis celebremus Hymnis  
 Omini fausto Genitalis Horæ  
 Metra dicantes.

## V I I.

Annuo ritu Lodoïci & Annæ  
 Nomen, & tanti pueri sonoro



Personent cantu iuga celsa pindi  
Antráque Cyrrhæ.

V I I I.

Seu quis abstrusæ studium Minervæ  
Sive Bellonæ meditetur artem,  
Ipse par Matri, similisque patri  
Iunget vtrúmque.

**A**L'Offerte de la Messe se chanterent aussi quelques Motets à la louange dudit prince Dauphin, & la Messe finie, le psalme *Exaudiat*, puis, avec les quatre chœurs de Musique, le Cantique *Te Deum*, durant lequel furent conduites trente-huit filles en memoire des 38. années qu'avoit le Roy; lesquelles précédoyent le Cardinal Anthoine, à douze ou quinze desquelles il donna cent escus pour entrer en Religion, & aux autres cinquante pour se marier. Apres cette ceremonie faite, vn pere Augustin fit vne tres-docte Oraison à la louange du Roy, de la France, & dudit sieur Cardinal Anthoine; l'Eglise estoit parée des plus riches tapisseries de son palais.

Le soir fut fait vn feu d'artifice deuant icelle Eglise où estoit représenté vn nuage aupres duquel estoit vn Cerbere qui representoit la guerre, la famine, & la peste, qui jetta des milliers de petarts & fusées contre ladite nuë, laquelle en fit reciproquement autant, puis la nuë se separa en deux, & parut vn Soleil qui fut bien vn quart-d heure en feu sans se consommer. Et dessus le portail de l'Eglise vne Lune qui fit le mesme effet, aupres de ladite nuë estoit agenouillée vne Reyne qui representoit la France avec certe inscription, *Donec veniant optata rogabo*, & vn Ange suspendu en l'air avec vne trompette, & cette inscription, *Iustus ut palma florebit.*



Le portail de l'Eglise estoit remply des Armes du rape, du Roy, du prince Dauphin, & dudit fleur Cardinal Anthoine, si grande qu'une fleur de Lys, ou vne mouche seule, auoit six pieds de haut, le tout reuestu de clinquant, & y auoit une infinité de lampes attachées dessus, qui furent allumées trois soirs durant: tellement que l'on peut asséurer qu'il y auoit tant en lampes qu'en lanterne plus de cinq mille lumieres, qui rendoient vn esclat merueilleux, & donnoient de l'admiration à tout le peuple.

Suiuit vn autre feu composé d'une quantité de fusées, que nous appellons icy gyrande, qui fit vn effet non gueres moins agreable que le feu qui se fait au chasteau saint Ange au iour de la saint pierre.

Le Lundy Monseigneur du Nozet Auditeur de Rote, & Recteur de l'Eglise saint Louys, en fit aussi vn autre sur la riuiere, où estoit representé d'un costé vn Hercule, & de l'autre vn Athlas, & au milieu vn Dauphin qui réussit fort bien.

Le Mardy, Monseigneur l'Ambassadeur en fit vn autre sur la riuiere, où estoit representé vn gros & puissant galion armé de toutes pieces, à la poupe duquel parut toujours ardent, & sans se consumer vn Dauphin, & des trois mats sortit vne si grande quantité de fusées, que tout le monde en demeura tout estonné.

Le Mercredy, ledit fleur Cardinal Anthoine ne voulant ceder aux autres en splendeur non plus qu'en dignité, en fist faire vn autre dans la grande place, qui est entre son palais & le Conuent des Capucins, lequel representoit l'heresie estendue sur vn rocher, tenant vn liure entreouuert remply de couleuvres & serpens. Le feuy estant fit vn tintamarre effroyable, pour la quantité d'artifice dont il estoit composé; & lors que l'heresie fut consommée, le rocher se separa, & parut vne colonne couronnée, laquelle s'ouurant fit paroistre les Armes du Roy toutes



en feu l'espace de plus d'un quart d'heure sans se consumer.

Le Ieudy, les Religieux Minimes de la Trinité, voyans que le Cardinal auoit bruslé le soir l'heresie, voulurent courir sur son marché, & en faire brusler le perc; & de fait, ils firent dresser sur le portail de leur Eglise vn saint Michel, & par consequent vn diable à ses pieds; le saint Michel parut toujours enuironné de lumiere, & le diable apres auoir fait beaucoup de bruit, jettant feu & flammes par les yeux, les cornes, & de toutes parts, fut enfin bruslé, consommé, & réduit en cendres.

Le mesme iour de Ieudy, Monsieur Gueslé Agent de France en fit vn autre dans la place de la Trinité qui representoit les Armes du Roy enuironnées de deux Dauphins, & jetta grande quantité d'artifice qui réussit fort bien.

Le iour de saint André, il fut fait vne procession pour transporter des Reliques de saint Yues, que l'on gardoit depuis quelque temps à saint Louys, depuis ladite Eglise de saint Louys à saint Yues où assisterent mondit seigneur l'Ambassadeur, & quantité de Noblesse Françoisse portans tous vn flambeau de cire blanche. là où intervinrent toutes les filles susdites vestuës de bleu, auxquelles Monseigneur le Cardinal auoit donné la dote.

A l'issuë de cette Procession, vn Pere Iacobin prescha tres-doctement à la louange de saint Yues, du Roy, & de la France, & le soir furent faits aussi des feux d'artifice deuant ladite Eglise, qui representoient vn Athlas, portant le globe de la terre, sur lequel estoient les Armes de France.

Le Dimanche, & le Mardy, mondit seigneur l'Ambassadeur fit faire des courses de cheuaux tout le long de la rue ou il demouroit, ou il y auoit prix d'une piece d'or & de soye.

Le Lundy, il fit courir les barques sur la riuere, & encore



core l'oye, où il donna semblable prix qu'à la course susdite.

Tous les quatre premiers soirs, les Palais de mondit seigneur l'Ambassadeur, & dudit sieur Cardinal, celui du Duc de Parme, & de Florence, mesmes de plusieurs autres seigneurs de Rome, furent environnez de flambeaux de cire blanche, & les autres particuliers se contentèrent de mettre des lanternes aux fenestres, & de faire des feux devant leurs portes. Ledit seigneur Cardinal Anthoine parut en cela plus splendide qu'aucun autre, y ayant à l'entour du sien plus de trois cens de tels flambeaux de quatre à six liures piece, & au dessous de la grande porte, il y auoit des chandeliers composez en forme de fleurs de lys; & le iour qu'il fit son feu, les hauts-bois sonnoient au dessus de ladite porte, les trompetes de l'autre costé resonnoient, & plus d'une douzaine de tambours batoient dans la place.

Après le feu, il fit courir la bague à la lumiere des flambeaux où Monsieur le Marquis de Lanty fit des mieux; à l'issüe de la course, il fit vn sumptueux banquet à mondit seigneur l'Ambassadeur, à Madame sa femme, à Mademoiselle sa fille, & mesme à quantité de noblesse; il y auoit ces iours là des fontaines de vin blanc, & de claret, tant chez mondit seigneur l'Ambassadeur, qu'en plusieurs lieux des François.

Les Religieux de saint Anthoine, au lieu de faire des feux qui ne seroient veus que de fort peu de monde, estans en lieu assez écarté, distribuerent six mil pains, d'environ trois blancs la piece, à tous les pauvres qui s'y trouuerent.


Enfin par toutes ces belles & rares inuentions, parut comme à l'enuie la pieuse allegresse des nostres, à laquelle se joignit la magnificence des Princes du saint Siege, puisque c'estoit à l'honneur de la naissance du Fils aîné de



l'Eglise : mesme quelques Princes estrangers témoigne-  
rent leur conjouissance , voyans ce signalé bien-fait du  
Ciel versé sur le plus florissant Estat de l'Europe , con-  
traints d'admirer la France qu'ils redoutent , comme par-  
ticulierement œillades de Dieu pour la pieté de ses Mo-  
narques , vrais protecteurs de la gloire de son Saint  
nom.







# REQVESTE

A LA REYNE

REGENTE

POVR LA PAIX VNIVERSELLE.



*Q V A D R A I N.*

**R**EYNE Fille d'un Roy, Vefve d'un  
 Roy tres-bon,  
 Mere d'un Roy, Dauphin né pour la Mo-  
 narchie,  
 Ramenez nous ce Roy, au fein de fa Patrie:  
 Car la Paix gist aux yeux d'un Roy né de  
 Bourbon.





A MONSEIGNEUR  
LE CHANCELLIER.

Q V A D R A I N.

O RACLE de Themis & du dernier des Roys,  
Qui ayt esté de Dieu donné pour cét Empire,  
Obtenez pour son peuple cette Paix qu'il respire,  
Après estre réduit comme vn Cerf aux abboys.

A MADEMOISELLE

Q V A D R A I N.

S I le Ciel adoucy par les Vœux de tant d'Ames,  
Veut déployer sa Grace & nous faire vn octroy,  
Ce sera de permettre que sous ce jeune Roy;  
Le cœur d'un sang de Roy, s'aproche de vos Flames.

*Permis faire imprimer ce Traité intitulé, Arrhes de  
Paix Vniuerselle, &c. Fait ce XVII. Avril 1649.*

Signé, DAVBRAY.